

陶雲汀先生奏疏

奏摺卷二十一目錄

撫蘇稿

安化陶

議覆徒陽運河挑辦章程摺子

附片

江淮帶徵錢糧分別緩徵摺子

總督會稿

覆查沛縣被水歉收請給口糧摺子

總督會稿

附奏興化積水已涸尚屬有收摺片

學政因病出缺摺子

御賜福字麇鹿肉謝

恩摺子

恭賀平定回疆生擒張逆摺子

驗收吳淞挑工併出力各員請獎摺子 附清單

總督會稿

附陳籌濬吳中水利未挑各河道摺片

吳淞江岸請建死事知府專祠摺子 總督會稿

蘇浙重運漕船全數渡江摺子

附奏續獲兇匪辦理摺片

動撥貧民口糧銀款摺子 總督會稿

附奏糶竣緩漕米價另款撥用摺片

議覆徒陽運河挑辦章程摺子

附片

奏爲查議徒陽運河挑辦章程恭摺覆

奏仰祈

聖鑒事竊臣承准軍機大臣字寄道光七年八月二

十二日欽奉

上諭御史蔣泰堦奏酌籌徒陽運河挑工一摺據稱
徒陽運河小挑派丹徒等四縣承辦大挑則調派
通省中缺分最優之十餘州縣協挑大半距工迢
遠又值開徵收兌不能兼顧悉委幕友丁書此輩
素未諳習工程夫頭等乘機挾制昂價居奇稍不

遂意紛紛聞散又有道府委員等刁難需索除由
司庫領銀外約計各州縣賠款多則萬餘金少亦
七八千金實皆幕友丁書朦混開銷委員及夫頭
等訛詐吞蝕實用到工不及十之三四仍易停淤
萬一軍船由內河出江臨時擱滯關係非輕等語
徒陽運河爲江浙軍船經由要路全在挑挖寬深
俾重運遄行無阻着陶澍督同藩司梁章鉅將應
如何委員辦工之處熟籌妥議並責成該管道府
盡心督辦務令工員領銀覈實支銷免其賠墊責
以疏濬俾河流通暢糧艘得以遄行該御史摺着

鈔寄閱看等因欽此當經恭錄轉行欽遵查議據
蘇州布政使梁章鉅常鎮通海道劉名載會詳
請

奏前來查徒陽運河自丹徒縣境江口起至丹陽
縣之呂城地方止綿長一百四十餘里水無來
源全藉江潮灌注潮汐挾沙而行潮落沙停易
致淤墊年年挑浚非不寬深而春水未生江潮
未旺之時河流終於微弱內如丹徒縣之猪婆
灘搜鹽廳便益橋流水洞王家灣刀山對奶野
狗墩等處皆係活沙膠泥隨浚隨漲尤爲著名

累工向係六年大挑一次由兩藩司在於蘇松常太揚通六府州屬酌派十一縣與鎮江府屬丹徒丹陽金壇溧陽四縣分段承辦其餘各年冬令擇淺小挑歸徒陽壇溧四縣承辦或有積淤較重該四縣力難勝任隨時確核情形酌添外府屬縣二三員幫辦所用經費並不請動正項錢糧但支丹徒縣樂生洲官租銀五千八百餘兩及司庫匣費等銀大挑之年二萬餘兩小挑之年一萬餘兩事竣造冊報銷一切土方夫工向有成例不能加增而工費日形昂貴嘉慶

四年十四年屢經議定江南有漕各州縣每年公捐協貼誠以浚河運漕凡有漕州縣皆分所應辦大挑六年一次係於通省內擇其力量稍寬者派委十餘員因缺分之有餘補工用之不足以公濟公尙不致過於竭蹶卽徒陽壇溧四縣年例挑辦其賠累雖較多於他邑然於例價之外得有協貼而工長費鉅之年又得添員幫辦若使經理得宜不爲家人書役朦混開銷其力亦尙可支持惟時值漕倉收兌殷忙各工員勢不能常川駐工親身查察或遣丁胥或交親

友卽無染指圖利之心而夫役終於輕視不受
約束更有不肖之徒先於雇夫時暗講折頭白
喫乾分甚至尅扣工價侵肥入橐遂爲夫頭把
持挾制百弊叢生此賠累所以日添而挑工易
致草率也臣與藩司梁章鉅悉心酌議以此案
挑浚工程計長一百餘里爲期不過月餘承辦
之地方官不能親身督工卽不免於諸多弊竇
計惟有慎於用人方可以杜絕諸弊而用人之
中則莫如令承辦州縣自舉其平素相信廉幹
之員無論實缺候補佐貳均准其詳明派調赴

工代辦蓋其人既係素信自必結實可靠足以稽察夫役丁胥朦混開銷之弊於承辦者所領經費既不致稍涉浮糜卽不致更形賠累且代辦之員如果經理得宜認真挑辦卽予記功嘉獎倘有草率偷減立卽撤叅亦責有攸歸各思奮勉以視悉委諸親友丁胥其情形迥不相同上年大挑之年卽係照此委辦頗爲得力嗣後應循照辦理至向來查工委員本無實濟近年早已裁撤自不慮再有滋擾又所用挑夫向由夫頭赴淮揚等處包雇每有浮冒夫數扣價入

己之弊亦應令代辦之員於開工時親自點驗
倘夫數不足卽拏該夫頭交縣究追衆夫臨工
怠玩偷安卽係夫頭督率不力立予枷示在局
丁書人役如敢婪索規費許該夫頭具稟查究
仍令代辦委員隨時嚴察庶爲切實至於挑挖
之淺深全憑誌椿灰印封墩惟易於移動擡高
卽可從中滋弊現據該司道核議請於誌椿左
右凡有木石牆堦堪以存識之處一體標明寬
深丈尺使無混淆亦爲杜弊起見總之任事在
於得人有治人卽有治法向來此案工程經理

不得其人誠不免有累於官而無益於工今循
照上年成例專責代辦工員切實經理仍責成
常鎮道鎮江府盡心實力認真督察自可以祛
除諸弊工竣後由臣再行親往驗收總期工歸
實用則挑浚自必寬深費不虛糜在工員自不
致於賠累矣所有查議緣由是否有當理合恭
摺覆

奏伏乞

皇上聖鑒謹

奏

道光七年十一月初六日具

奏十二月初六日奉到

硃批另有旨欽此又同日奉到道光七年十一月二十一日內閣奉

上諭陶澍奏查議徒陽運河挑辦章程一摺前據御史蔣泰堦奏徒陽運河挑工向由於幕友丁書之朦混開銷及夫頭等之訛詐吞蝕致挑濬不能如式易於停淤當飭該撫督同藩司熟籌妥議茲據查明積弊在所不免皆由於承辦州縣正值漕倉收兌之時不能常川駐工查察所致上年大挑運

河卽將此弊革除令該州縣自舉所知詳明調派赴工代辦頗爲得力著照所請嗣後卽照此辦理責令承辦州縣於實缺及候補佐貳內各舉素悉廉幹之員詳明派赴工次令其代辦如查出夫頭有浮冒夫數任令衆夫怠玩偷安及在局丁書人役婪索夫頭規費等弊隨時送交該縣懲辦務令將挑挖寬深丈尺一體標明使無淆混仍責成該道府認真督察工竣後該撫親往驗收總期積弊盡除運行通暢無得有名無實該部知道欽此

再臣查徒陽運河水無來源專藉江湖挾沙而
來歲須挑挖大批年分工段綿長一百數十里
例銷亦止三萬餘兩不及河工一草壩之費本
屬無從偷減不慮不歸實用惟兩岸由鑿山而
成高崖壁立出土維艱如猪婆灘野狗墩刀山
對奶等處尤形陡峻紅水濕泥出於山麓挑挖
愈深則崖腳愈虛傾卸入河阻遏彌甚與別處
河道情形迥異近來大江多有沙漲京口潮來
勢緩一值西風刮耗潮入更稀兼之重空二運
經過時正當冬盡春初雨水未生江流尙涸雖

挑濬已深而亦無潮可入實爲漕運之一累臣
思糧船經行南北運河自清江浦至高寶一帶
則有洪澤湖自黃林莊至韓莊一帶則有微山
湖自夏津至東昌一帶則有南旺安山等湖皆
蓄爲水櫃俾資緩急未有但恃挑工無水接濟
如徒陽運河者也溯查從前原有練湖一所收
納長驪諸山八十四汊之水北接丹徒境謂之
上練湖南接丹陽城謂之下練湖周圍共一百
六十里淵注渟著古名曲阿後湖又曰練塘始
自晉時迄於唐宋皆加修治盜決侵耕之禁甚

嚴每於春夏蓄水秋冬濟運遇淺涸時但放湖水一寸卽爲運河一尺宋元史志皆載其事明史亦言丹徒以上運道視江湖爲盈涸京口閘底與虎邱塔頂平可知挑河無益蓄水爲要等語惟查此湖舊址自康熙年間上練湖已改民田升科僅存下練湖四十里但能灌田不復能濟運所有涵洞滾壩幾同虛設其運河舊設之奔牛呂城陵口黃泥新豐大犢等閘亦多就頽廢每當軍船停淺無策可施臣此次勘視運河周歷上下練湖親至湖心亭彌望荒煙水深不

及尺許因思上練湖固難議復卽下練湖亦未
易言挑浚第就現存之湖加築堤埂遇山水漲
發亦可蓄至七八尺果能申嚴決洩之禁收蓄
渟涵俟冬春淺涸時開溝引水從湖東北角之
張官渡啟涵放入運河將下游之呂城等閘堅
閉勿泄使水勢迴激向北而西縱京口潮來不
旺亦足資濟急其上練湖初受山水處名曰莊
前河水分兩道一係正流穿田南去卽下練湖
之源也一係分支循溝東去則黃泥壩入運之
水也其分支之處向設黃金閘一座以擎東支

水使併歸下練湖無如上練湖旣改民田下練湖之水仍須自上練湖迤邐而來中間雖有橫埂而南北地勢相平下練湖之水蓄至七八尺則上練湖之田亦淹至二三尺矣是以居民不利閘之存而反利閘之廢遇春夏水發時輒將黃金閘決開使水向黃泥壩直洩無餘而下練湖已無水可蓄不俟秋冬早形淺涸矣現在黃金閘廢壞無存實由于此雖愚民無知然田旣陞科亦難聽其淹浸惟有就水所經行處兩岸先築堤埂以次修復黃金閘使水歸下練湖足

資多蓄而不致回漾增高以淹上練湖之田則
濟運之源裕矣仍將運河各閘擇要興修查照
舊章依時啟閉俾湖水放出尺寸皆歸有用於
運道情形可期有益惟是工鉅費繁非旦夕所
能奏效而一勞永逸之策亦無踰於此容俟籌
有款項再細勘辦以利漕渠於農田灌溉亦不
無小補謹附片具陳伏乞

聖鑒謹

奏

道光七年十一月初六日附

奏十二月初六日奉到

硃批妥籌經久之策務收實效欽此

再徒陽運河前淮漕臣來咨須俟各幫船掃數
進口南下再爲煞壩興挑當經臣於十月二十
一日赴吳淞江勘辦挑工隨即馳抵鎮江督催
僭挽因值小汛期內江湖微弱運河水勢淺小
以致幫船進口稍艱而在後之蘇松船隻又與
江廣各幫相間行走尙未全出瓜口臣卽飭委
署鎮江營叅將張壽同鎮江營守備盧奎光賁
持令箭在於瓜洲鎮江一帶催提並面諭常鎮
道鎮江府督同丹徒縣設法籌催務令大汛期
內各幫全行進口以便煞壩挑河臣仍就近查

看運河及練湖等處情形適接督臣來咨明年
新漕因糧船回空尙早已奏明仍由河運亟須
趕辦兌漕事宜臣卽于二十九日回省辦事沿
途見常州沿河停船尙多復委督糧通判書桂
持令催提以期饋歸水次修船候兌合併附片
以

聞謹

奏

道光七年十一月初六日附

奏十二月初六日奉到

硃批知道了欽此

江淮帶徵錢糧分別緩徵摺子

總督會稿

奏爲江淮各屬帶徵節年舊欠錢糧未能同時並
納恭懇

聖恩分別緩徵以紓民力事竊照本年江淮各屬上
元等州縣衛因夏秋雨水過多低田積水收成
歉薄業經臣等將歉收田地本年應徵新賦
奏請緩徵欽奉

恩旨允准除坐落本年歉區應徵節年舊欠已於前
摺聲明照例分別遞緩外其本年熟田舊欠錢
糧亦經聲明俟各屬體察民情由司彙核詳辦

今據署江寧藩司覺羅慶善詳據江寧淮安揚州徐州海州五府州將本年被歉各屬內熟田及本年通境雖尙有收而向係積歉之處民力未免拮据請將舊欠錢糧分別緩徵詳請具

奏前來

臣

等覆加查核各屬皆係上年被淹較重

及頻年積歉之區今年雖屬有收元氣未復若將積年舊欠同時啟徵民力實有未逮該藩司各就地方酌量請將本年熟田應徵舊欠錢糧分別緩徵均屬實在情形所有上元江寧江浦六合蕭縣等五縣請帶徵分徵案內最遠一年

及道光六年災緩初限錢糧其道光三四五年銀米應請緩徵又句容山陽安東海州四州縣請帶徵道光六年災緩初限及熟田未完錢糧其分徵案內最遠一年以及道光三四五年銀米應請緩徵又阜寧清河桃源鹽城四縣及碭山縣之崇教原奉等里請將分徵案內最遠一年及道光三四五六年錢糧全行緩徵又高郵泰州東臺江都甘泉儀徵興化寶應等八州縣請帶徵道光六年熟田未完及災緩初限銀兩其道光六年漕米及分徵案內最遠一年並道

光三四五年錢糧概請緩徵又銅山邳州宿遷等三州縣請帶徵分徵案內最遠一年銀米其道光三四五六年錢糧應請緩徵又豐縣請帶徵道光五年熟田未完並六年災緩初限錢糧及嘉慶二十三年並道光三年出借倉穀沛縣請帶徵道光五年初二限錢漕該豐沛二縣分徵案內最遠一年及道光三四六年銀米應請分別緩徵又睢寧縣請帶徵分徵案內最遠一年並道光三年錢糧其道光四五六七年銀米應請遞緩又沐陽縣請帶徵分徵案內最遠之嘉

慶二十五年錢糧及二十三四年兩年尾欠並道光六年銀米其道光三四年五年錢糧應請遞緩以上各屬熟田舊欠相應仰懇

皇上天恩俯准照所請緩徵年分分別緩至來年秋後啟徵以紓民力淮安大河揚州徐州四衛屯田隨同坐落州縣一律辦理除飭查造應緩款冊咨部外至本年坐落歉區應行帶完嘉慶二十三年起至道光二年舊欠地漕等項錢糧米麥豆石應徵最遠之一年併道光三四年五六等年災區錢糧仍照例分別遞緩合併聲明

臣等

謹合詞恭摺具

奏伏乞

皇上聖鑒訓示施行謹

奏

道光七年十一月二十五日具

奏十二月二十六日奉到

硃批另有旨欽此又同日奉到道光七年十二月十

一日內閣奉

上諭蔣攸銑等奏江淮各屬帶徵節年舊欠錢糧請分別緩徵一摺本年江淮各屬上元等州縣衛低

田被水歉收業經降旨將本年新賦加恩緩徵茲據該督等覆查各屬皆係上年被淹較重及頻年積歉之區元氣未復若將積年舊欠同時啟徵民力未逮自係實在情形所有上元江寧江浦六合蕭縣等五縣帶徵分徵案內最遠一年及道光六年災緩初限錢糧道光三四五年銀米句容山陽安東海州四州縣帶徵道光六年災緩初限及熟田未完錢糧分徵最遠一年及道光三四五年銀米阜寧清河桃源鹽城四縣及碭山縣之崇教原奉等里分徵最遠一年及道光三四五六年錢糧

高郵泰州東臺江都甘泉儀徵興化寶應等八州
縣帶徵道光六年熟田未完及災緩初限銀兩道
光六年漕米及分徵最遠一年併道光三四五年
錢糧銅山邳州宿遷等三州縣帶徵分徵最遠一
年銀米道光三四五六年錢糧豐縣帶徵道光五
年熟田未完併六年災緩初限錢糧及嘉慶二十
三年併道光三年出借倉穀沛縣帶徵道光五年
初二限錢漕豐沛兩縣分徵案內最遠一年及道
光三四六年銀米睢寧縣帶徵分徵最遠一年併
道光三年錢糧道光四五六七年銀米沐陽縣帶徵

分徵嘉慶二十五年錢糧及二十三四年尾欠併道光六年銀米道光三四五年錢糧著照所請緩徵年分准其分別緩至來年秋後啟徵其淮安大河揚州徐州四衛屯田准其隨同坐落州縣一律辦理至本年坐落歉區應行帶完嘉慶二十三年起至道光三年舊欠地漕等項錢糧米麥豆石應徵最遠一年及道光三四五六等年災區錢糧俱准分別遞緩以紓民力該部知道欽此

覆查沛縣被水歉收請給口糧摺子

總督會稿

奏爲遵

旨查明恭摺覆

奏仰祈

聖鑒事竊照道光七年十月十二日承准軍機大臣
字寄道光七年十月初三日奉

上諭江蘇句容等二十四州縣被水來春應否接濟
之處查明於封印前奏聞等因欽此

臣等跪讀

恩綸仰見我

皇上軫念災黎有加無已之至意當卽恭錄轉行欽

遵確查去後茲據署江寧布政使覺羅慶善蘇
州布政使梁章鉅查明各州縣衛情形詳請核
奏前來臣等伏查江蘇省本年各州縣衛被淹歉
收情形當經會摺奏奉

恩旨緩徵錢糧均已渥沾

闕澤茲復荷

特諭垂詢

臣

等細加體察惟沛縣秋被水淹勘不成

災除千一等五里民情尙不致於困苦來春無
庸接濟外惟坊一等十二里連年水旱頻仍民
情拮据來春青黃不接之時應需接濟相應恭

懇

天恩將沛縣勘不成災之坊一廣一廣二泗二上下
千三上千三下平六上千六下漢二下漢三上
漢四漢五上等十二里乏食貧民

賞給一月口糧俾資接濟感沐

仁慈益無涯涘其蘇藩司所屬太倉州等處收成稍
減情形本輕毋庸查辦江藩司所屬上元等各
州縣衛雖屬歉收現在情形尚可毋須接濟統
俟來春察看情形如有無力佃農應需酌借籽
種口糧及出易平糶之處臨時酌量查辦所有

查明沛縣勘不廣災之坊一等十二里來春應
需接濟緣由謹合詞恭摺具

奏伏乞

皇上聖鑒謹

奏

道光七年十二月初四日具

奏八年正月初十日奉到

硃批候旨遵行欽此

附奏興化積水已涸尙屬有收摺片

再本年江蘇省江淮等屬低田積水勘不成災

業經

臣等

奏奉

諭旨緩徵錢糧在案茲據署江寧藩司覺羅慶善詳稱續據揚州府轉報該屬興化縣低田積水業已疏消情形尙無妨礙仍請徵收新賦等情旣據該府覆查屬實應將道光七年新賦錢糧飭令照常徵輸所有本年秋災情形案內興化縣低田積水緩徵之處請

奏明扣除前來臣等查興化縣積水既經涸復據該司覆核尙屬有收自應將道光七年新賦錢糧照常徵收除批令速飭興化縣遵照辦理並於通案緩徵冊內扣除造報咨部外謹合詞附片具

奏伏乞

聖鑒謹

奏

道光七年十二月十九日附

奏八年正月二十二日奉到

硃批知道了欽此

學政因病出缺摺子

奏爲學政因病出缺恭摺奏

聞仰祈

聖鑒事竊臣前准江蘇學政臣辛從益咨會因病

奏請開缺調理並請

旨簡員接任等因旋接江陰縣知縣葉維庚稟稱學

政辛從益因病勢沉重醫藥罔效於十二月十

四日出缺將學政關防委員賁送前來臣查學

政辛從益考試平允諸凡認真惟因年老多病

尙有江寧松江鎮江揚州通州四府一州科試

未竣現值封印期內學政衙門並無應辦要件
其江蘇學政一缺先經辛從益奏請解任計已
蒙

簡放有人臣暫將學政關防接收照例兼署一面飭
江陰縣將辛從益身後一切事宜妥爲照料外
所有學臣因病出缺理合恭摺奏

聞伏乞

皇上聖鑒再辛從益遣屬賫到遺摺一扣囑臣代進
謹附入封內恭呈

御覽合併陳明謹

奏

道光七年十二月二十日具

奏八年正月二十二日奉到

硃批知道了欽此

御賜福字麇鹿肉謝

恩摺子

奏爲恭謝

天恩事道光七年十二月二十六日摺并回蘇賚奉
御書福字暨麇鹿等肉

頒賞到

臣

謹卽恭設香案望

闕叩頭祇領欽惟我

皇上泰祉駢臻

龐禔膺集平康用錫

鴻疇徵嚮五之庥

戢穀罄宜鹿雅叶肄三之奏挹

奎光於

義畫

寶字宜春扇瑞脯於

堯厨珍饈飽

德臣渥叨

嘉貺屢沐

均禔記拜

賜於迎年門增五福屈服官而

詔祿頌進三多書思用勵夫丹忱鼎養彌慚夫素食

華鵲石罌文章聯卿喬之輝腴摘山膚膏澤飲馨香之

治冀共吳民而樂凱韻譜

熙臺還偕衆志以享牢

恩宣

仁罔所有

微臣

感激下忱謹繕摺恭謝

天恩伏祈

皇上聖鑒謹

奏

道光八年正月二十九日具

奏二月二十七日奉到

硃批知道了欽此

恭賀平定回疆生擒張逆摺子

奏爲叩賀

天喜仰祈

聖鑒事茲

臣

接閱邸抄欣悉逆回張格爾就擒欽奉

上諭長齡等奏生擒首逆由八百里加緊馳報覽此
捷奏實深嘉悅寅感之餘與中外臣民同深慶幸
等因欽此逃聽之下曷勝忭舞歡忻之至欽惟
皇上德隆泰運

道洽師貞若日月之照臨怙冒弗遺西土卽雨風之
調變會歸早協

皇圖屬小醜偶肆披猖致

天討遠勞撻伐

簡元戎而宏

廟算有將皆飛策勁旅以振

國威無堅不破士氣倍增奮迅

神功默運扶持鹿險欲窮黨項願爲先導虎嶼旣
失谷渾遂報生擒雪嶺塵清玉關春曉計鬼方
之克何待三年洗瀚海之兵弗遺一矢將軍訝
從天而下壯士歌入塞而還臣快誦露章歡臚
星庶當

北關獻俘之日正東風應律之時

大德曰生殲渠魁而

恢仁網止戈爲武綏邊徼而慶

春臺

經綸遠邁夫漢唐干羽直追夫虞夏有不戰戰必勝
共仰堂堂正正之師不言功功最高彌欽蕩蕩
巍巍之

聖所有

微臣

踴躍欣忭下忱謹率同江寧布政使

臣

賀長齡蘇州布政使

臣

梁章鉅署江蘇按察使

臣

潘恭常繕摺恭賀

天喜伏乞

皇上聖鑒謹

奏

道光八年二月十三日具

奏三月二十日奉到

硃批知道了欽此

賀摺用黃綾面黃紙心紅紙裡奏封黃面紅裡
請

安摺封黃面紅裡

驗收吳淞挑工併出力各員請獎摺子

附清單

總督會稿

奏爲挑濬吳淞江工程驗明如式完竣仰祈

聖鑒事竊照吳淞江年久淤塞關係蘇省水利前經

臣等會議興挑奏奉

諭旨遵行當卽飭委司道督同各府州勘估實需銀數及督飭興辦情形復經恭摺具

奏欽奉

諭旨吳淞江自井亭渡起至曹家渡止工段較長經該督等委員勘估通共挑河築壩估銀二十九萬

九千一百八十七兩零若由上海等三縣領辦恐其照料難周不免草率著照所請除上海工長承挑二分青浦嘉定二縣承挑一分外其餘著添派得沾水利之元和吳江震澤崑山新陽太倉鎮洋寶山等八州縣各承挑一分所有承辦各員如果勤奮出力著於工竣時量予獎勵倘草率玩延卽著嚴叅總期工歸實用帑不虛糜著該撫親往核實驗收其動用工費除平糶米價銀款造報外其外籌之款卽著毋庸報銷等因欽此當復轉行各司道欽遵嚴催各工員趕緊如式挑竣去後茲

據蘇州布政使梁章鉅署江蘇按察使潘恭常
護理蘇松太道陳燮會詳承辦各州縣於上年
十月十一日攔潮大壩合龍之後雇集人夫肩
水興挑祇因開工以後時值嚴冬連遭雨雪挑
挖河道積水較多雖經隨時車戽而涸復之後
又逢雨雪且時屆沍寒上下河堤冰凌凍結夫
役不能立足人力難施其震澤崑山新陽太倉
鎮洋五州縣承挑工段坐落野鷄墩一帶古淺
處所積淤深厚幾成平陸應挑土方倍於他處
是以歲內未能一律完竣迨至今年正月天時

晴霽飭催印委各員添雇人夫設法趕挑所有
起出之土俱令遠堆原定界外築成堤堰以防
傾卸復隨時督催各工員認真挑挖務使一律
深通以收實效現據署蘇州府知府李景嶧署
松江府知府王有慶蘇州總捕同知范博文蘇
州督糧同知王青蓮轉據各工員陸續具報工
竣並據新陽縣稟稱所挑工段內起出遠年沈
溺糧船一隻板片朽爛艙內尚有磁碗煤炭等
物又據上海縣稟稱所挑工段內起出遠年沈
溺海船一隻板片朽爛查有洋木秤桿鐵錘等

物俱係海船應用之物深入沈淤現經起出候
驗等因前來並據藩司梁章鉅詣驗如式臣蔣
攸銑現赴清江勘工不克會詣吳淞臣陶澍卽
遵

旨親往驗收於二月初七日在蘇啟行由白茆等處
一路查勘順抵吳淞江親赴各工按照估冊逐
段勘量自青浦縣頭壩起至上海縣攔潮大壩
止通工計長一萬八百八十九丈有零細加覆
勘悉與原估寬深丈尺有贏無絀內有太倉新
陽上海嘉定吳江鎮洋青浦寶山等州縣均於

原估丈尺之外加工挑挖其寬深多至二三尺及六七尺不等均係捐資辦理並無偷減草率情弊臣復以攔潮大壩爲新開河道尾閘若壩基未能啟除淨盡卽于全河大有阻礙遂親至工所督飭該道府及各員弁竭五晝夜之力趕緊將攔潮大壩柴草堅埽及下戢積土逐層啟除淨盡定限于十七日丑刻先將青浦上游頭壩開放使清水流注充滿午刻將上海下游大壩開放目擊水勢暢出洶湧如雷壩外淤泥立時衝散未刻海潮大至水勢擡高內外刮刷臣

卽乘潮回省沿途按段測量水深均有一丈九尺至二丈不等實爲一律深通毫無淺滯之處訪詢沿途耆庶咸稱百餘年來未有如此開空深通之工臣逐段驗收歡聲載道卽如各縣所挑工段內起出沈溺糧船海船等多年陳物湮埋江底爲從前開浚所未及者茲皆挑空起出其爲深通勝于往時已有明證從此舟楫暢行旱潦無慮民生永資利賴

閘賦愈樂輸將堪以仰副

皇上軫念農田水利覆育蒼生之至意所有通工挑

河築壩共銀二十九萬九千一百八十七兩零
原議籌動海運案內節省贈五等米價銀

奏准于平糶緩漕米價先行借動當將緩漕米價
二十六萬五千七百三十二兩零給發支用在
案今海運停止贈五等米無從節省歸款仰懇
皇上天恩俯准將原借平糶緩漕米價銀二十六萬
五千七百三十二兩零卽作爲挑浚吳淞經費
就款開銷感沐

聖恩益無旣極仍飭令照數造報此外不敷銀三萬
三千餘兩以及興工後因遇雨雪車戽一切費

用增多並各州縣于原估之外加挑寬深所需
工費皆在外自行捐措仍欽遵

諭旨免其報銷至此次工程經藩司梁章鉅屢次親
詣督率籌辦署臬司蘇松太道潘恭常協同商
酌均極精詳妥協但係司道大員不敢仰邀議
敘其承辦各員臣等查明實在勤奮出力者開
列清單遵

旨保

奏仰懇

皇上恩施量加獎勵其餘出力各員弁人數衆多分

別咨部議敘由外記功核實辦理再查委員內
武進縣縣丞陸鈞於辦工喫緊時藉病遷延候
補府經歷陳溶雇夫遲玩現在工程雖無貽悞
仍應請

旨交部議處以儆將來所有挑濬吳淞江全工完竣
驗收緣由謹合詞恭摺具

奏伏乞

皇上聖鑒訓示謹

奏

謹將挑辦吳淞江工程尤爲出力人員開具清

單注明實蹟恭呈

御覽

護理蘇松太道加道銜蘇州府知府陳鑾署蘇
州府松江府知府李景嶧蘇州府督糧同知王
青蓮署太倉州邳州知州李正鼎、

以上各員陳鑾李景嶧總理全局督率認真
王青蓮幹練實心任勞任怨李正鼎承挑古
淺格外寬深均請以應陞之缺陞用

上海縣知縣捐陞知府李廷錫

該員承挑第十一十二兩分工段最多又攔

潮大壩險工係其獨辦並幫挑第六分難工二百丈均各妥速竣事爲承挑各工第一出力之員查該員已遵酌增常例捐陞知府不論雙單月卽用並捐離任可否俟赴部投供時以本班儘先選用出自

聖恩

前任金匱縣知縣捐陞知府齊彥槐蘇州府總捕同知范博文嘉定縣知縣捐陞知府淡春臺吳江縣知縣時功旃新陽縣知縣德宣青浦縣知縣蔡維新寶山縣知縣陳玉成署崑山縣知

縣盧本淳署鎮洋縣知縣景壽春松江府經歷
張慶瑗江陰縣縣丞畢以紱嘉定縣縣丞姚大
成長洲縣主簿李述三

以上各員或督辦催餽或承辦挑工或分任
幫挑均極切實認真諸臻妥協應請交部從
優議敘

南匯縣縣丞鄭祖經蘇州府照磨謝元淮運河
營守備盧永盛

以上各員鄭祖經幫辦新陽難工謝元淮幫
辦上海險工盧永盛調築攔潮大壩均極勤

奮認真不辭勞瘁鄭祖經前于海運案內奉旨以應陞之缺陞用應請遇有相當缺出不論繁簡卽行陞用謝元淮盧永盛均請以應陞之缺儘先陞用

揚州府檢校胡澤光青浦縣新涇司巡檢陞署元和縣主簿方景雯海州惠澤司巡檢魏邦魯昭文縣白茆司巡檢林觀光

以上各員查催認真幫辦工程尤爲出力請以應陞之缺陞用

試用府經歷錢家驥試用主簿李琮試用主簿

曹錫璜試用未入流程勦

以上各員承催幫挑均各實心實力不辭辛
瘁應請各照本班儘先補用

道光八年三月初六日具

奏四月初七日奉到

硃批另有旨欽此又同日奉到道光八年三月二十
一日內閣奉

上諭蔣攸銛等奏挑濬吳淞江工程完竣一摺江蘇
吳淞江年久淤墊前經飭令興挑茲該督等查明
通工挑河築壩一律完竣並無偷減草率情弊著

照所請准將原借平糶緩漕米價銀二十六萬五千七百三十二兩零卽作爲挑浚吳淞江經費就款開銷仍飭令照數造報其不敷銀三萬三千餘兩及興工後一切增多費用並各州縣自行捐措之款著仍遵前旨免其報銷藩司梁章鉅署臬司蘇松太道潘恭常籌辦商酌均極精詳俱著加恩交部議敘護理蘇松太道加道銜蘇州府知府陳鑾署蘇州府松江府知府李景嶧蘇州府督糧同知王青蓮署太倉州邳州知州李正鼎俱著以應陞之缺陞用上海縣知縣捐陞知府李廷錫著俟

赴部投供時以本班儘先選用前任金匱縣知縣
捐陞知府齊彥槐蘇州府總捕同知范博文嘉定
縣知縣捐陞知府淡春臺吳江縣知縣時功旃新
陽縣知縣德宣青浦縣知縣蔡維新寶山縣知縣
陳玉成署崑山縣知縣盧本淳署鎮洋縣知縣景
壽春松江府經歷張慶瑗江陰縣縣丞畢以綬嘉
定縣縣丞姚大成長洲縣主簿李述三俱著交部
從優議敘南匯縣縣丞鄭祖經前於海運案內以
應陞之缺陞用著遇有相當缺出不論繁簡卽行
陞用蘇州府照磨謝元淮運河營守備盧永盛俱

著以應陞之缺儘先陞用揚州府檢校胡澤光青浦縣新涇司巡檢陞署元和縣主簿方景雲海州惠澤司巡檢魏邦魯昭文縣白茆司巡檢林觀光俱著以應陞之缺陞用試用府經歷錢家驥試用主簿李琮曹錫璜試用未入流程勲著各照本班儘先補用其餘在工出力各員并著查明分別咨部議敘由外記功核實辦理武進縣縣丞陸鈞於辦工時藉病遷延候補府經歷陳溶雇夫遲玩俱著交部議處該部知道單併發欽此

附陳籌濬吳中水利未挑各河道摺片

再查道光四年挑辦黃浦一路水利動借經費銀七萬七千二百餘兩奏奉

諭旨俟吳淞江工竣攤徵歸款現在吳淞江挑竣其上游濱湖各處尙須籌濬又瀏河白茆等處前經奏明分年辦理及常州之孟瀆等河現俱淤墊日甚旱澇堪虞亟須籌辦所有黃浦工程原借銀兩應請俟各工籌有頭緒再行辦理歸款合併附片具陳謹

奏

四庫全書
道光八年三月初六日附

奏四月初七日奉到

硃批知道了欽此

吳淞江岸請建死事知府專祠摺子

總督會稿

奏爲吳淞江岸請建前任勤事知府周中鉉專祠
仰祈

聖鑒事據蘇州藩司梁章鉅護理蘇松太道陳鑾會
詳稱道光七年議濬吳淞江欽奉

諭旨允行於九月下旬興工先在上海縣曹家渡地
方建築攔潮大壩爲通工鈐束該處逼近海口
潮汐奔騰兩岸皆沙土鬆浮適值連日東風大
作潮勢洶湧異常遂致旋築旋蟄該司道親往
督辦目擊風猛雨淋挾潮而進壩底刷深至三

丈餘尺勢甚危急人力難施詢之士人僉稱江岸有周太僕祠夙著靈應該司道親詣虔禱並於壩頭設祭沉以牲醴頃刻之間驟轉西風大潮頓落卽夕堵築合龍本年二月通工挑竣臣陶澍親往攷壩赴祠禱祝西風復作海潮消退清水建瓴而下內外刮刷全河一律深通自始至終險工獲佑查周太僕名中鉉浙江山陰縣人雍正年間任松江府事時方挑濬吳淞

特命副都御史陳世倌會同總督范時繹巡撫陳時夏督辦中鉉承築大壩因潮水洶悍屢築屢潰不

能合龍中鉉親率河標把總陸章乘船衝流督
夫下埽風急水溜陸章請移舟登岸中鉉不可
遂與陸章俱歿於水而堤亦旋合時雍正六年
三月二十九日也事

聞奉

上諭周中鉉平日居官甚優今被溺殞命更可惋惜又
於巡撫陳時夏摺內欽奉

硃批周中鉉等可謂因公盡命深可惋惜覽至此朕幾
乎淚落等因旋奉

旨議卹贈太僕寺卿

予祭葬乾隆二十六年經巡撫陳宏謀題祀名宦事載
世宗憲皇帝硃批諭旨及雍正六年

上諭併松江府志等書該處士民追思舊澤私建小祠
於吳淞江畔歲時報享祈禱皆應今挑濬吳淞
復著靈異僉請建立專祠春秋致祭臣等伏思
東南財賦莫重於蘇松而年穀順成必資乎水
利吳淞江爲衆流入海之要津實東南水利之
關鍵茲蒙

皇上軫念民生

特允動款興挑從此水澤常通永資利賴惟願海施

工極爲艱險乃當堵築大壩於勢甚危急之際
化險爲平工竣啟壩復俾潮迴清注暢刷深通
是周中鉉爲

國宣勞精誠不泯生前旣因築壩死事歿後復以
捍潮効靈功在吳淞洵爲昭著記載以死勤事
則祀之能捍大患則祀之周中鉉雖經從祀名
宦未有專祠合無仰懇

聖恩准於吳淞江岸建立專祠列入春秋祀典俾輿
情獲遂水利長沾再查吳淞江岸舊有小祠現
經護理蘇松太道陳鑾就近估修卽於舊址擴

充修葺毋庸另行擇建所需工費由藩司及該
護道等捐辦其春秋祭銀循照成案於學租款
內支給歸地方官辦理合併陳明伏乞

皇上聖鑒

勅部議覆施行謹

奏

道光八年三月初六日具

奏四月初七日奉到

硃批另有旨欽此又同日奉到道光八年三月二十

一日內閣奉

上諭蔣攸銛等奏吳淞江岸請建前任知府專祠一摺江蘇吳淞江岸舊有前任松江府知府周中鉉祠宇該處士民歲時祈禱皆應茲該督等奏挑濬吳淞江時復以捍潮效靈功在該處洵爲昭著周中鉉著准其於吳淞江岸建立專祠列入春秋祀典該部知道欽此

蘇浙重運漕船全數渡江摺子

奏爲恭報蘇浙兩省重運漕船全數渡江完竣日

期仰祈

聖鑒事竊照本年起重運漕糧欽奉

諭旨於四月初十以前全數僨至清江尅期抵壩臣

以漕務莫重於蘇省事體繁難趕辦宜亟尤於
湖河全局有關迭經督飭各屬趕早兌開正月
二十九日徒陽運河挑工完竣啟壩後卽將鎮
江重運漕船先行催提出口其蘇常等屬各幫
並令跟接渡江臣於鎮江同省時復遴委鎮江

府照磨余錫溥鎮江府知事冷善長丹徒縣主簿吳錄呂城司巡檢沈起鯨高家司巡檢莫如柏溧陽縣丞陳鴻慶鎮江營守備盧奎光把總冉鏜等執持令箭在於常州丹陽丹徒一帶隨同地方文武分段節節押催一面加派署臣標中軍叅將陳述祖蘇州衛守備吉壽等分赴蘇松各屬迎提在後幫船加緊饋行務令銜尾前進茲據常鎮道劉名載鎮江府知府趙光祿稟報蘇松等五府州屬起運漕白糧船及浙省幫船共計二千九百八十八隻截至三月初八日

掃數渡江完竣查上屆道光七年蘇浙兩省全幫係三月初十過竣爲歷來渡江最早之年五六兩年係三月十九二十等日過竣本年徒陽運河因雪雨連綿挑挖難施較往年遲至月餘始行啟壩各屬漕船又比上年計多一百餘隻今過竣日期較之七年分更早二日比較五六兩年早及一旬運行迅速爲向所未有現在全幫渡江距淮僅止數程

欽限四月初十以前早可抵壩趁黃流盛漲未發時源源北上堪以仰慰

宸厯除催漕出力各員弁俟全漕渡黃後彙案酌辦
外所有蘇浙兩省漕船全數渡江日期謹會同
大學士兩江總督臣蔣攸銑繕摺具

奏伏乞

皇上聖鑒謹

奏

道光八年三月十三日具

奏四月十一日奉到

硃批知道了欽此

附奏續獲兇匪辦理摺片

再准徐松江揚州各屬毗連豫東濱臨江海向
爲兇徒出沒之所節經臣飭屬嚴拏梟匪兇盜
不下三百餘名分起審辦均經附片

奏明在案冬春之交糧艘往來絡繹匪徒尤易竄
入復經嚴飭各屬加意巡緝迭據清河銅山等
縣稟獲安徽梟匪穆虎及首兇郝元景訊認在
靈璧縣地方毆傷差役宣同身死宿遷沛縣併
贛榆縣稟獲逃兇顧三喜孫二逸盜朱三虎孫
名先訊係在直隸青縣砍死王三遼河南祥符

縣殺死王四山東蘭山縣搶奪宋建壽等拒殺
事主案內之犯又據宿遷儀徵山陽武進等縣
稟獲盜犯胡殿成張廷嵇士順嵇少白子張雙
喜安應祥兇犯李文進等訊據供認竊刦清河
高郵等州縣事主張張氏等家得贓挾嫌砍傷
王全敬身死不諱並據南匯縣稟報先後訪獲
盜匪莊秀等十五名訊認曾在龍頭山海洋行
刦浙江事主應文英滙船衣物併將船隻拆毀
又據蕭縣銅山縣稟稱接准河南永城縣關緝
在豫傳教之聶士貞耿泳升二犯當卽會同碭

山縣將耿泳升等拏獲搜查該犯等家內並無
違礙經卷圖像據聶士貞供指曾拜耿泳升爲
師習教傳徒訊之耿泳升狡不吐實俱解豫質
審等情臣查穆虎等均在外省鄰縣犯案該縣
等留心察訪于各犯入境時卽行拏獲其在豫
傳教之聶士貞等接准該省咨緝單內尙有李
連仲等七名籍隸河南恐聞拏緊急遁入江境
自應一體堵緝免致兔脫當經批飭將各犯解
歸犯事各州縣審辦一面實力查拏毋稍鬆勁
以絕根株而靖地方合將續獲各匪辦理緣由

附片以

聞伏乞

聖鑒謹

奏

道光八年三月十三日具

奏四月十一日奉到

硃批嚴密查辦務淨根株斷不可稍有疏縱欽此

動撥貧民口糧銀款摺子

總督會稿

奏爲動撥

恩賞貧民口糧銀款仰祈

聖鑒事竊

臣

等接准部咨道光八年正月初三日奉

上諭上年江蘇省句容等州縣衛被水歉收業經降旨分別緩徵小民自可無虞失所惟念今春青黃不接之時民力未能寬裕除太倉上元等州縣無庸接濟外著加恩將沛縣勘不成災之坊一等十二里乏食貧民賞給一月口糧以資接濟用示朕履端布惠慶洽羣黎至意等因欽此仰見

聖主惠愛黎元有加無已之至意當卽轉行藩司欽
遵併刊刷謄黃遍行曉諭一面確查實需銀數
請撥去後茲據江寧布政使賀長齡詳稱據徐
州府稟稱卷查沛縣道光六年秋災案內坊一
等十二里冬賞一月口糧共放銀一萬六千七
百四十七兩零今春該縣坊一等十二里一月
口糧請就上屆銀數約計先行撥發銀一萬七
千兩等情除飭將應給戶口趕緊查竣由府覆
加抽查核實詳辦外查司庫正項內漕價一款
現有存銀所有應給貧民兵屬口糧銀一萬七

千兩請卽於漕價款內動撥如有不敷卽於司庫正項銀內酌量找撥其貧生口糧銀兩照例於存公款內支用事竣核實造報請銷詳請奏明撥用前來臣等覆加察核據請動撥口糧銀一萬七千兩係就上屆放過數目先行約計自應早爲籌備相應恭懇

天恩俯准按數動撥以資散放事竣核實造報如有餘剩報部撥用除飭該管道道府督飭印委各員核實散放務期實惠均沾仍隨時嚴密察訪如有胥役尅扣冒濫情弊立即據實嚴叅究辦所

有動撥沛縣口糧銀款緣由謹合詞恭摺具

奏伏乞

皇上聖鑒謹

奏

道光八年三月十三日具

奏四月十一日奉到

硃批另有旨欽此又同日奉到道光八年三月二十

七日內閣奉

上諭蔣攸銍等奏請動撥貧民口糧銀款一摺江蘇沛縣坊一等十二里上年歉收曾經降旨於今春

青黃不接之時賞給乏食貧民一月口糧茲據該督等查照上屆放過口糧銀數請先發銀一萬七千兩著照所請准其於司庫內按數動撥事竣核實造報如有餘剩報部撥用該督等卽飭該管道府督率卽委各員認真散放務期實惠均沾毋使吏胥致弊該部知道欽此

附奏糶竣緩漕米價另款撥用摺片

再查道光六年冬間籌辦留養災民案內請將蘇屬緩漕俟徵有成數留爲七年春間減價平糶先經臣於道光六年十一月會摺

奏奉

諭旨著准其將道光六年帶徵三年災緩二三限漕米及五年徵剩緩漕俟各屬報有成數卽扣留貯倉免其搭運於青黃不接時酌運江南北各災歉州縣減價出糶其留養災民各處專令災民糶買俾得接濟有資等因欽此卽經轉行欽遵在案茲

卷三十一
據蘇藩司梁章鉅蘇糧道額騰伊會詳稱緩漕
米石均已糶竣糶價銀兩業經動撥詳請

奏明前來查前項徵存緩漕共計米一十三萬六
千二百七十二石八斗二升一合七勺據各屬
具報已運赴江南北災歉州縣及留養災民之
處減價以每石一兩九錢五分全行糶竣計提
存糶價銀二十六萬五千七百三十二兩一厘
業經糧道先後入冊報撥續因挑浚吳淞江河
道工程

奏明動用現經臣於吳淞工竣摺內

奏請就款開銷在案除飭道將糶過米數價銀查
明年款另行造冊咨部外所有道光七年糶竣
緩漕米石及米價另款撥用緣由理合附片陳
明伏乞

聖鑒謹

奏

道光八年三月十三日具

奏四月十一日奉到

硃批覽欽此